

## «Cuant che sei nassuda jo»

A erin passâts apena una ventina di agns da fin da Prima Vuera Mondiâl, sji començava a alçâ il cjâf cerint in cualchi mût di sanâ las feridas profundas ch'a veva lassât inta nosta int. No doma ricostruî i paîs das macerias: las feridas ma chês da l'anima a erin inmò plui profundas e a vevin cicatrices che nuia e nissun a podevin vuarî.

Tancj paisans (e no doma) a àn cirût una normalitât di vita lontans di achì, fint tas Americas, fûr da chest scenari di conflit, di dolôr, di distruzion, di disperazion, dulà che a no era restada la pussibilitât, cun duta la buina volontât, di podei pensâ a un avignî dignitôs.

Fîs, oms, fradis, la miôr zoventût da nosta Nazion a veva sacrificada la vita pa libertât, sul front dai nostis confins, dai nostis monts. A sji po doma inmaginâ la disperazion das fameas di chescj martars e encja di chei che a àn patît las consequenças das feridas, di mutilazions o malatias. E cence dismenteâ i dispers.

Duncja, acjaval dai agns Cuaranta, sji tornava a slungjiâ sora di nou l'ombra da Seconda Vuera Mondiâl.

Al inizi, i caporions sji conta che a vevin dât l'ilusion che al fos stat un intervent di poucja durada, ma dopo cui lôr trabandui di aleancias e tradiments... pensi che ur è sfuida di man e sji sa cemût che a è lada a finî: Albania, Africa, Grecia... nus àn glotût una ata volta la nosta zoventût e mai come in chei timps dal om a è saltada fûr tanta violença disumana: poucj a àn vût la gracia di tornâ das presons e ce che a àn passât no vevin nencja il coragjo di contâ. Patiments di ogni sorta, fan, fadia, violencia, malatia, debilitazion, ur tolevin prin di dut la dignitât: ju cunsjideravin come nemâi, ju ridusevin a automas cença volontât, come pupinats tas lôr mans, tant che nencja lôr stes sji riconossevin plui. Pensi doma as deportazions, ai campos di concentrament, ai fors crematoris, as sevizias in nom da "pura razza ariana". Jo no varès mai il coragjo di lâ a visita chescj lûcs, a mi àn sconvolt doma a sintî a contâ, lei, jodi par television. Saraial cussì misericordiôs il Signôr da podei perdonâ dut chest? Jo pensi che al volarès un infern inmò plui sot par cui che al à pensât, fat, comandât chesta disumana strage e violença. Plui anemai di cussì no si po jessi.

Tornin al nosti teritori, al nosti paîs. Una anada das plui tragjicas par nou a è stada chê dal 1944. Chest an a son 70 agns. Una paggina da nostra storia scritta cul sanc: no par meti sâl su la ferida, ma par che il sacrifici di tancj nol seti stât dibant, sji cjapin cusiença dai sbaglios dal passât, capissarìn che no po jessi pâs ta violença, tas vueras, ma tal rispiet e fratelança vorin dut di che vuadagnâ.

28 di Mai dal 1944: al era il dì di Pentecostas e a buinora cul son dai componons, jo stavi nassint. Conti chest fat personâl par via che al po jessi chel di ognun di chei che in chel an a son nassûts. Pa prima volta agna Tuta no è plui a contâmi di che zornada, come che a faseva ogni an. A era encja jê dongja di mê mari in che dì. Tal paîs a coreva vous che a stavin par rivâ i todescs che coma al solit a minciavin che a varessin cjapât ducj i oms che a cjatavin cenca savei ce fin che a varessin fat. Di conseguenza chescj àn scugnût scjampâ e fra lôr al era ancja mê pari. Un troput a son

lâts a finîla in Som Frinz, dulà che a erin platâts in tuna gondula. Gno pari al stava in pinsîr parcè che al veva lassada mê mari, za cun las doias.

Ven l'ora che ai dât il prin berli, agna Tuta cuant che a à jodût che al era dut benon si cjapa sù di corsa e a va sù pa gosa di Ana e a taca a vosâ: “Sisto tu âs una fruta e al è dut benon”. Finalmentri gno pari al tira un sospîr di soliêf e di contentecia. Tal trop di chescj oms al era encja Pii che sji veva puartât daûr una boracia di vin, al à tirada fûr e al à det: “Chesta a è l'occasion buina par bevi un got”. Ma dopo un pouc gno pari al voleva sincerâsi bessol e vegnî ju a jodi, riscjiant. Dopo veinus jodudas me e mê mari, al era periculous tornâ sù. Sot la scjala in cjasa nosta, ch'a lava su tal plan di sora, a era una botula, scavada tas fondas, che a lava ju encje l'âga dal seglâr, gno pari al sji è lât a platâ aî sot, fint che il pericul nol era passât.

A era tanta la soddisfazion di jessi pâri che lui al voleva metimi non Felizita, par fortuna che mê mari lu à po convint a metimi chel di sô sùr, che a era muarta zovina, da pousj agns a Milan, dulà che a era a sarvî. Dal 1943, al mûr encja il fradi Pieri, vegnût za malât da l'Albania, ai restava inmò Sanzio. In chel dì di Pentescostas ta Valuta, a vevin taiât tal bosc, Sanzio cun tun ati zovenut al era a fâ la vuardia al cason. Ai dîs al fantaciut: “Va ju tal paîs a tolimi spagnolets, che sei restât cence”. Encja par che no sji stufàs a stâ di bessol lassù. Cuant che al torna, i à domandât se a 'nd era novitâts, il frut ai rispuint che al à jodût a lâ a batiâ (ch'a sji usava batiâ in zornada i fruts, apena nassûts): “Sastu – ai dîs – che Maria di Sisto a à comprât una fruta”. “Ce i aia metût non po?”, ai torna a domandâ. “Silvia, ai sintût”, i rispuint. E gno barba: “A è me sùr chê. Sta achì atent tu, cumò, che voi a jodi e po torni biel svelt”.

Al riva ju e tal burò al à tirât fûr il plui biel grimâl di seda che al tigniva come una relicuia a ricuart di sô mari. So mari a lu veva comprât di zovina intun paîs todesc, cuant che a era sfilera. Sanzio al puarta il grimâl a mê mari: “Tu j âs metût il non di nosta sùr, sei propit content, cun chest grimâl cumò tu i fasarâs una biela gabanuta”. Ma l'â fata mê santula Luziuta di Grif cu las maniutas a sbuf, ingrispada e doi bieci nastro su pas spalas.

Gno barba Sanzio al è muart l'an dopo, prin di vei la soddisfazion di jodimi a fâ i prins pas.

Al era malât e ai diseva a mê mari: “Cuant che a cjaminâ, puartila fint dal stâli di Mestin e po lassila cjaminâ bessola, jo voi sul balcon dal cjamarin a viodila rivâ”.

“Dio vede e Dio Provvede”, las mâris di una volta pur ta granda miseria, a vevin dutas cuâsi il lat par lunc timp par cressi i lôr fruts. Jo cressevi benon, ma dopo un pousj di meis eri duta dada fûr, duta un rost. A mi puartin dal miedi e chel al dîs di gjavâmi il lat di mâri parcè che a era za indaûr inzinta di mê sùre par chel a mi faseva mâl. Gno pâri intant al veva cjatât di fâ il pastôr in Zuplan. La sera dopo il lavôr, al toleva una butilia di lat e al vegniva a puartâmal par che lu ves simpri fresc. Al sun da l'Ave Maria da buinora al era za tornât su, par començâ zornada. Ce sacrificis.

A je tocjada biela encja a Pierina dal Picot, cuant che a à comprât il Berto. Al era il meis di Avost e Gjino di Nelon, il so om, al era ricoverât tal ospedâl di Tumieç. Jei a era lada a cjatâlu, naturalmentri a pît, ma cuant che a veva di tornâ a cjasa i à començât i mâi. Il Berto al veva premura di nassi, par fortuna che a era inmò lajù, senò se a sares stada bessola e par strada, no sai ce che al sares sucedût. Fato sta che

al è nassût a Tumieç. L'indoman, la sôr Virgjinia, insiema a Esterina da Calan, che a lava encja jê a cjatâ la sôr Rene son ladas a jodi di chescj malâts. Virgjinia a è tornada sù, dopo, cun Pierina (simpri a pît) e il frut tal braç. Encja se nol era grandon a puartâlu un tic par on, a son rivadas a cjasa stracas sfinidas: figurâsi la femina frescja di part, ce riscjio. Ma in chê volta a era cussì.

Jo sei stada simpri insurida da fruta. Mâri mi diseva: “Par fuarcia tu sês cussì slotara, che tu vâs simpri saltant cà e là come un zupet, parcè che fin dai prins dîs eri cun tei, simpri tal braç, invuluçada intuna cuzinuta chi scjampavi ju di agna Menia che vevi tanta poua a stâ bessola cuant che si sintiva dî ch'a rivavin Todescs, Mongui, Cosacs... Una volta – mi diseva – sintivi vosâ... cji cjapi su di corsa e via... cuant che eri in som da cort, un mi ferma e mi fâs segn di mostrâi ce che platavi tal braç, alci un blec da cuvierta e lui cji cjiala e al dîs: “Bela tosa”. Chel nol era todesc di sigûr”.

Al era il '44, “l'an das pulçs e da fan” al cjanta un comples di Paulâr, nou podin dî “l'an dai fruts e da fan”, parcè che no 'nd è stada anada plui prolifica che jo veibi sintût a dî.

Si dîs che sin nassûts in 32, 6 muarts di piçui e 26 vivûts. A à començât la Luci da Vira, il prin di Zenâr e dopo encje plui di un al meis, fintremai al Rinaldo, il 12 di Dicembar. Purtrop causa da vuera, no 'nd era lavôr e par chest tancj oms a erin a cjasa. Dut intorn a era poua, fan, miseria... ce ati confuart podevino vei se no di fâsi coragjo l'un cun l'âti tal afiet?

Ma il Signôr al à pensât ben di fâ florî tanta vita par dâ sperancia. Nonostant tanta miseria e disperazion, nissun al è muart di fan e sin achì a dimostrâ che la Provvidenza a è granda tai siei disegns.